



He Rautaki Matihiko  
**mā Aotearoa**

Kei te whakatakotoria e tēnei tuhinga ngā mātāpono e toru tērā ka whakatere ake i te takoha o te rāngai matihiko o te whenua nei ki te oranga pāpori, ōhanga anō hoki o Aotearoa, ā, ka tautoko i te whanaketanga wā roa ake o te ahumahi hei uho waiwai ki tō tātou whenua mō āpōpō.

Ka tautoko ngātahi ngā mātāpono e toru i te whānuitanga o ngā putanga, tae atu ki: te whakapiki i te uara o ngā hoko matihiko ki tai, te tuku i ngā tūnga whai uara ināianei, mā ngā reanga o āpōpō hoki, te rauhi i ngā Tikanga Māori me te ahurea o Aotearoa, te whakatairanga i ngā tikanga tōtika i te rāngai tūmatanui, me te paihere i te wairua auaha i ō tātou ahumahi matua.

## Anei ngā mātāpono e toru: **Te Noho Tuwhera**, **Te Mana Taketake**, me **te Aumangea**

### **Noho Tuwhera**



- Hapahapai māramatanga
- Whakahaere ngātahi ā-ao
- Whakamōrahi hiranga
- Whakamimiti para

### **Mana Taketake**



- Motika Māori
- Mana motuhake
- Tūmataiti ki mua
- Apo kore

### **Aumangea**



- Mahi uara nui
- Ōhanga mātauranga
- Noho motuhake
- Hāngaitanga

# Te Noho Tuwhera

## Te whakahaere ngātahi ā-ao

Te whakarite kia hangaia ngā pūnaha rāngai tūmataiti me te tūmatanui o Aotearoa ki ngā paerewa tuwhera, mā reira e māmā ai te whakahaere tahi me te kōmitimiti ki ērā atu pūnaha i Aotearoa, i te ao rānei, hei tuku painga ki ngā tāngata o Aotearoa. Te whakapakari me te whakarahi i ngā pūmanawa angitu pērā i Koha, te pūnaha whakahaere Whare Pukapuka he mea hanga i Horowhenua, ka whakamahia ināianei i ngā mano tini whare pukapuka tūmatanui puta noa i te ao.

## Te whakamōrahi i te hiranga

Te whakamahi i ngā rongoā pūmanawa herekore "tino pai rawa" me te urutau kia tau ai ki ngā hiahia ā-takiwā, kia tōtika ā-ahurea, ki te whāngai i te wairua auaha me te waihanga whai wāhitanga mā ngā pakihī me ngā hāpori. Pērā i ētahi o ngā pakihī nui rawa o te ao, i a Google, Amazon me Facebook, i hangaia te Catalyst Cloud ki te pūmanawa herekore—koia te kapua tuatahi i Aotearoa e tautuku ana ki te NIST.

## Te whakamimiti para

Te whakarite kia whakamahi taunoatia te pūmanawa herekore i ngā pūnaha rāngai tūmatanui, me te whakatītina i te whakamahi anō me te tiritiri, hei whakamōrahi i tā te Karauna haumi ki ngā pūmanawa, me te whakaiti rawa i te noho whirinaki ki te hoko raihana mai. Te noho mariu ki ngā kaupapa hangarau mōhiohio hihiri ake, iti ake i te rāngai tūmatanui mō te whakarato ratonga tūmau, tē whakamahi ai i ngā pūnaha whakahara, whai motika rawa ā-hinengaro, ka whakaputa i ngā pikinga utu ohore me te hautau anake o te uara i kī taurangitia.

## Te hapahapai i te māramatanga

Ko te taunoa, me noho tuwhera ngā raraunga a te Kāwanatanga. Me noho wātea ngā raraunga me ngā hātepe o ngā tari ki te whakatātarenga ki te whakapakari i tō tātou whakawhirinaki ki tō tātou mana taupori. Me noho wātea ngā raraunga e utua ana e te iwi hei whakamahi anō, hei whakamahi ā-arumoni mō te whāngai i te wairua auaha.

# Te Mana Taketake

## Ngā motika Māori

Te āhukahuka me te tiaki pūmau i ngā mōhiohio matihiko, mātauranga rānei mō te Māori, nō te Māori rānei, te reo, ahurea, rawa, taiao Māori anō hoki. Te whakarite mā te tangata whenua o rātou anō taonga e whakahaere, ā, kia tautokona ki te whakapakari i ō rātou whai wāhitanga ōhanga.

## Te mana motuhake

Te whakarite mā ngā tāngata o Aotearoa ā rātou raraunga e whakahaere, tō rātou mana motuhake e whakapūmau tonu i roto i te ao e awea ana e te hangarau, i te ao e nui haere ai te whakahaeretia e ngā pūmanawa rorohiko. Te whakakite i ngā mahi auaha e maea mai ana i konei, pērā i te kaupapa whakamahi i te atamai hangahanga ki te aroturuki i te rangona o te reo Māori i ngā reo irirangi o te ao, me te whakanui i ngā hoko ki tāi a te rāngai matihiko ki te ao.

## Ko te tūmataiti te mea tuatahi

Te whakatapu i te motika tūmataiti matihiko, me ngā tikanga hei tiaki, i ngā ture o Aotearoa, pērā i tā te GDPR whakatapu i tērā. He rawa te tūmataiti e kore e taea te whakahōu, he rawa anō hoki kāore i te tino uariatia. Te whakarite kia whakamana ngā whakataunga kaupapa here i te motika o ngā tāngata o Aotearoa ki tō rātou anō tūmataiti.

## Te apo kore

Te whakatenatena i te tupu mai o tētahi mākete tōkeke e taea ai e ngā kamupene ratonga matihiko o Aotearoa te whakataetae me te whakahaere i runga i ngā mātāpono kua whakaaetia: te utu tāke, te whakaute i ō Aotearoa ture, me te kore e whakaaro ko ō tātou kirirarau me ā rātou raraunga he rauemi kia hīkarotia, kia hokona atu hoki ki te tangata kei a ia te piti nui rawa.

# Te Aumangea

## Ngā mahi whai uara nui

Te haumi ki ngā ahumahi o te rohe kia taea ai e ngā whakatupuranga kei te heke mai te mahi tonu me te whai aramahi e utu paitia ana i roto i tō tātou rāngai. Te āhukahuka i te pānga whakarea e whakahokia ai ia 30 hēneti i roto i te tāra i utua ki ngā kamupene o Aotearoa ki te Karauna, ahakoa horipū mai, ahakoa takaāwhio mai.

## Te ōhanga mātauranga

Te aro ki te hanga i te ōhanga uara nui, me ngā hoko taumaha kore ki tai, me ngā aramahi maha hei whāinga mā te kaimahi whai pūkenga. Te whakahou i ngā tikanga whakawhiwhi a te kāwanatanga kia whai whakaarohia te uara, kua ko te utu anake. Te āhukahuka i tō te hangarau mōhiohio raukaha ki te whakawhana i ērā atu o ō tātou ahumahi waiwai, pērā i te ahuwhehua, te tāpoi me te hauora. [Te noho motuhake](#)

Te whakawhanake i te āheinga me ngā pūnaha tērā e whakarite kia kua a Aotearoa e whakawhirinaki ki ngā kaiwhakarato me ngā pūnaha nō tāwāhi hei tuku i te hangahanga waiwai e hiahia ana tātou i tēnei ao matihiko. Te whakarite ki te tūpono mai he aituā taiao, e kore tātou e mate ki te whakawhirinaki ki te ipurangi o waho ki te whakarato ratonga waiwai ki ngā tāngata o Aotearoa.

## Te hāngaitanga ā-ahurea

Te whakarite kia whakawaeheretia, kia whakaatatia ō tātou uara e ngā pūmanawa me ngā hātepe e whakamahia ana i Aotearoa, me te kore e kawē mai i ētahi anō whakaaro aukati, whakahāweatanga hoki ki roto i tō tātou pāpori. Te whakawhanake pou tarāwaho hei whakahaere i te tomokanga mai o ngā hangarau e maea ana pēnei i te atamai hangahanga me te pūmanawa āhukahuka kanohi, kia āta tau ai ēnei ki tō tātou taiao ahurea, ā-ture hoki.